

Communicaziun a las medias

Otmar Seiler mida da RTR tar «Schweiz aktuell»

Cuir, ils 28-10-2015 – **Otmar Seiler lavura dapi 1999 per Radiotelevisiun Svizra Rumantscha. Entschet ha el sia carriera schurnalistica tar il Radio Rumantsch. Avant otg onns è el i tar la Televisiun Rumantscha. Uss mida el per l'emprim da favrer 2016 tar SRF nua ch'el lavura sco moderatur e redactur per l'emissiun «Schweiz aktuell».**



Foto: Otmar Seiler

Otmar Seiler, 46, lavura dapi l'onn 1999 per Radiotelevisiun Svizra Rumantscha (RTR) a Cuir. Là ha el emprendì il mastergn da schurnalist: Seiler ha accumpagnà plirs onns auditors ed auditurs dal Radio Rumantsch tras la damaun e lavurà daspera sco redactur per differents formats. 2007 ha el midà tar la Televisiun Rumantscha, l'emprim sco moderatur da las emissions «Telesguard» e «Cuntrasts». Pli tard ha el era anc lavurà sco redactur e schurnalist da video e sco producent tar RTR ed ha manà tras l'emissiun da discurs «Tavulin».

Uss mida Otmar Seiler da RTR tar SRF: Davent dal 1. da favrer 2016 daventa el successur dad Oliver Bono e lavura sco moderatur e redactur per l'emissiun «Schweiz aktuell». Otmar Seiler è spanegià sin la nova sfida: «Sur onns hai jau astgà rapportar per RTR da las pli differentas fassetas dal chantun Grischun. Uss ma legrel jau sin il public da «Schweiz aktuell» e sin istorgias interessantas or da tut ils chantuns e las regions da la Svizra.»

Ladina Heimgartner, directura RTR: «Cun Otmar Seiler perda RTR in collavuratur fitg versà e stimà. Nus gudagnain dentant in ambassadur excellent per la Svizra rumantscha ed il Grischun tar SRF.»